



ADamus ex nobili familia Schvualbachiorum natus, & in omni genere uirtutum educatus est. Is cum armorum exercitia amaret, adolescens factus Cæsarís Caroli militiam sequutus fuit. Postea uerò ut commodius Turcis resistere, atque Christianorum rempublicam sua fortitudine iuuare posset, eques constitutus Rhodiorum militum ordinem suscepit, atque cum fratre Conrado in insula Melita res multas præclare gessit. Postea uerò in patriam rediit, atq; Herbipolis Iohannitarum domus præstantissimæ Commendator constitutus fuit. Cum etiã aliquos sui ordinis equites per Germaniã multis rationibus superaret, supremi Magistri Georgij Hochenhemij, qui dignitate principes æquat, Coadiutor eligitur, ea conditione, ut illo fato functo totius ordinis gubernationẽ per Germaniam amplectatur. In eo uitæ genere Adamus multis animi & corporis uirtutibus conspicuus etiamnum pergit, & sibi magnum apud Germanos & externos nomen comparatum conseruare studet. Anon.